



ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք. Երևան

03.11.2016թ.

Ո Ր Ո Շ ՈՒ Մ

ՀՀ գնումների բողոքարկման խորհրդի

թիվ ՍՑ-45/16

ՀՀ գնումների բողոքարկման խորհրդի (այսուհետ նաև՝ Խորհուրդ) բողոքը քննող հանձնաժողովը՝ գործելով Խորհրդի անունից, քննելով ՀՀ ֆինանսների նախարարության 11.04.2016թ. թիվ 1/73-1/11828-16 գրությամբ ներկայացված «Սամնարարինտ» ՍՊԸ-ին (ՀՎՀՀ 01244541) գնումների գործընթացին մասնակցելու իրավունք չունեցող մասնակիցների ցուցակում ներառելու պաշտոնական ընթացակարգով նախաձեռնված բողոքը (այսուհետ նաև՝ ՍՑ-ԳԲԽ-45/16 բողոք), ինչպես նաև ուսումնասիրելով ՍՑ-ԳԲԽ-45/16 բողոքի վերաբերյալ «Գնումների աջակցման կենտրոն» ՊՈԱԿ-ի (այսուհետ նաև՝ Կենտրոն) 01.11.2016թ. ներկայացրած եզրակացությունը, պարզեց հետևյալը.

1. ՀՀ ֆինանսների նախարարության ներկայացրած փաստերը և պահանջը

ՀՀ ֆինանսների նախարարությունը 11.04.2016թ. թիվ 1/73-1/11828-16 գրությամբ դիմել է «Գնումների աջակցման կենտրոն» ՊՈԱԿ-ին (այսուհետ նաև՝ Կենտրոն)՝ առաջարկելով ուսումնասիրել «Սամնարարինտ» ՍՊԸ-ին (այսուհետ նաև՝ Ընկերություն) գնումների գործընթացին մասնակցելու իրավունք չունեցող մասնակիցների ցուցակում (այսուհետ նաև՝ Ցուցակ) ներառելու հիմքերը և այդպիսի հիմքերի առկայության դեպքում ձեռնարկել անհրաժեշտ միջոցներ վերջինիս Ցուցակում ներառելու համար:

2. «Սամնարպրինտ» ՍՊԸ-ի ներկայացրած փաստարկները և դիրքորոշումը

«Գնումների աջակցման կենտրոն» ՊՈԱԿ-ը, հիմք ընդունելով «Գնումների մասին» ՀՀ օրենքի 5-րդ հոդվածի 1-ին մասի 4-րդ կետի «բ» ենթակետը, կարծիք ստանալու նպատակով 12.04.2016թ. N 01/04.2/1467-16 գրությամբ դիմել է «Սամնարպրինտ» ՍՊԸ-ին:

«Սամնարպրինտ» ՍՊԸ-ն 24.05.2016թ., 06.06.2016թ. և 21.06.2016թ. Կենտրոնին ներկայացված համապատասխանաբար թիվ 09/5662-16, թիվ 09/5971-16 և թիվ 09/6444-16 գրություններով հայտնել է, որ Ընկերությունը «Գորիսի բժշկական կենտրոն» ՓԲԸ-ի կողմից հայտարարված «ՍՄԳԲԿ-ՇՀԱՇՁԲ-15/3» ծածկագրով շրջանակային համաձայնագրերի միջոցով գնում կատարելու ընթացակարգին մասնակցելու նպատակով ներկայացրել է հայտ: Ընթացակարգի հայտերի բացման նիստը կայացել է 08.12.2015թ. ժամը 10:22-ին, սակայն Ընկերության կողմից ներկայացված հայտը մերժվել է: Ընկերության պնդմամբ վերջինս հայտը ներկայացնելու՝ այն է 08.12.2015թ. ժամը 10:22-ի դրությամբ չի ունեցել ժամկետանց պարտքեր հարկային վճարների գծով: Տվյալ օրվա դրությամբ Ընկերության հարկային պարտավորություններն առաջացել են 12:44-12:52 ընկած ժամանակահատվածում՝ նախորդող տարիների հաշվետվությունների ճշգրտման արդյունքում՝ Մաշտոցի ՏՀՏ-ի կողմից ստացած թիվ 800/2015 գրության հիման վրա:

«Սամնարպրինտ» ՍՊԸ-ն, պատշաճ ծանուցված լինելով 26.05.2016թ. ժամը 15:00-ին Կենտրոնում կայացած ՍՑ-ԳԲԽ-45/16 բողոքը քննող հանձնաժողովի նիստի վերաբերյալ, ապահովել է իր ներկայացուցչի մասնակցությունը: Նիստի ընթացքում Ընկերության ներկայացուցիչը պնդեց, որ «ՍՄԳԲԿ-ՇՀԱՇՁԲ-15/3» ծածկագրով շրջանակային համաձայնագրերի միջոցով գնում կատարելու ընթացակարգի հայտերի բացման նիստի պահի դրությամբ Ընկերությունը չի ունեցել ժամկետանց հարկային պարտավորություններ:

3. «Գորիսի բժշկական կենտրոն» ՓԲԸ-ի ներկայացրած փաստարկները և դիրքորոշումը

«Գորիսի բժշկական կենտրոն» ՓԲԸ-ն (այսուհետ նաև՝ Պատվիրատու) 11.04.2016թ. թիվ 30 գրությամբ հայտնել է, որ «Գորիսի բժշկական կենտրոն» ՓԲԸ-ի կողմից կազմակերպված «ՍՄԳԲԿ-ՇՀԱՇՁԲ-15/38» ծածկագրով շրջանակային համաձայնագրերի միջոցով գնում

կատարելու ընթացակարգին մասնակցության հայտ ներկայացրած «Սամնարարինտ» ՍՊԸ-ն հայտը ներկայացնելու օրվա դրությամբ ունեցել է ժամկետանց հարկային պարտավորություն:

Պատվիրատուն 11.04.2016թ. թիվ 30 գրությամբ ներկայացրել է «ՍՄԳԲԿ-ՇՀԱՇՁԲ-15/38» ծածկագրով շրջանակային համաձայնագրերի միջոցով գնում կատարելու ընթացակարգին վերաբերող անհրաժեշտ փաստաթղթերը:

Պատվիրատուն, պատշաճ ծանուցված լինելով Կենտրոնում 26.05.2016թ. ժամը 15:00-ին տեղի ունեցած ՍՑ-ԳԲԽ-45/16 բողոքը քննող հանձնաժողովի նիստի վերաբերյալ, չի ապահովել իր ներկայացուցչի մասնակցությունը:

4. ՍՑ-ԳԲԽ-45/16 բողոքի վերաբերյալ «Գնումների աջակցման կենտրոն» ՊՈԱԿ-ի դիրքորոշումը

«Գնումների աջակցման կենտրոն» ՊՈԱԿ-ը Խորհրդին է ներկայացրել իր 01.11.2016թ. եզրակացությունը և առաջարկել ՀՀ ֆինանսների նախարարության 11.04.2016թ. թիվ 1/73-1/11828-16 գրությամբ ներկայացված «Սամնարարինտ» ՍՊԸ-ին ներառել գնումների գործընթացին մասնակցելու իրավունք չունեցող մասնակիցների ցուցակում՝ ՀՀ գնումների բողոքարկման խորհրդի որոշումը կայացվելու օրվանից հաշված վեց ամիս ժամկետով:

5. ՍՑ-ԳԲԽ-45/16 պաշտոնական ընթացակարգով նախաձեռնած բողոքի քննության համար էական նշանակություն ունեցող փաստերը

ՀՀ ֆինանսների նախարարության 11.04.2016թ. թիվ 1/73-1/11828-16 գրությամբ ներկայացված «Սամնարարինտ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու պաշտոնական ընթացակարգով նախաձեռնած բողոքի քննության համար էական նշանակություն ունեն հետևյալ փաստերը՝

1. «Գորիսի բժշկական կենտրոն» ՓԲԸ-ի կողմից «Գորիսի բժշկական կենտրոն» ՓԲԸ-ի կարիքների համար տպագրական աշխատանքների ձեռքբերման նպատակով կազմակերպված «ՍՄԳԲԿ-ՇՀԱՇՁԲ-15/38» ծածկագրով շրջանակային համաձայնագրերի միջոցով գնում կատարելու ընթացակարգին (այսուհետ նաև՝ Ընթացակարգ) մասնակցելու նպատակով «Սամնարարինտ» ՍՊԸ-ն **08.12.2015թ.** հայտ է ներկայացրել:

2. «Սամնարպրինտ» ՍՊԸ-ն Ընթացակարգին մասնակցելու նպատակով հայտի N 2 հավելվածով՝ հրավերով սահմանված մասնակցության իրավունքի պահանջներին իր տվյալների համապատասխանության մասին հայտարարությամբ, հայտնել և հավաստել է, որ հայտը ներկայացնելու օրվա դրությամբ չունի ժամկետանց պարտքեր ՀՀ հարկային և պարտադիր սոցիալական ապահովության վճարների գծով:

3. Ընթացակարգի գնահատող հանձնաժողովը 08.12.2015թ. ժամը 11:00-ին կայացած նիստի թիվ 2 արձանագրության 3-րդ կետի «բ» պարբերությամբ որոշել է 1-9 չափաբաժինների մասով «Սամնարպրինտ» ՍՊԸ-ին ճանաչել 2-րդ տեղ զբաղեցրած մասնակից:

4. «Գորիսի բժշկական կենտրոն» ՓԲԸ-ն, ՀՀ ֆինանսների նախարարությանն ուղղված ՀՀ կառավարության 10.02.2011թ. N 168-Ն որոշմամբ հաստատված «Գնումների գործընթացի կազմակերպման» կարգի 47-րդ կետի 1-ին ենթակետով նախատեսված տվյալների ճշտման մասին 30.03.2016թ. կատարված հարցմամբ, խնդրել է տրամադրել տեղեկատվություն «Սամնարպրինտ» ՍՊԸ-ի վերաբերյալ:

5. Ի պատասխան վերը նշված հարցմանը՝ ՀՀ ֆինանսների նախարարության կողմից Պատվիրատուին 02.04.2016թ. տրամադրվել է եզրակացություն, համաձայն որի «Սամնարպրինտ» ՍՊԸ-ն **հայտ ներկայացնելու՝ 08.12.2015թ. դրությամբ ունեցել է 231.793 ՀՀ դրամ** ժամկետանց հարկային պարտավորություն:

6. Ընթացակարգի գնահատող հանձնաժողովը 16.12.2015թ. ժամը 12:00-ին կայացած նիստի թիվ 3 արձանագրությամբ որոշել է «Սամնարպրինտ» ՍՊԸ-ի հայտը մերժել:

7. Կենտրոնը 15.07.2016թ. ՀՀ ԿԱ պետական եկամուտների կոմիտեին ուղղված թիվ 01/04.2/2734-16 գրությամբ, խնդրել է տրամադրել տեղեկատվություն «Սամնարպրինտ» ՍՊԸ-ն 08.12.2015թ. դրությամբ ունեցել է ժամկետանց պարտքեր Հայաստանի Հանրապետության հարկային և պարտադիր սոցիալական ապահովության վճարների գծով, թե ոչ:

8. ՀՀ ԿԱ պետական եկամուտների կոմիտեն 01.08.2016թ. թիվ 6-1/22950-16 գրությամբ հայտնել է, որ ՀՀ ԿԱ ՊԵԿ հարկային ծառայության տեղեկատվական բազայում 21.07.2016թ. դրությամբ «Սամնարպրինտ» ՍՊԸ-ն 08.12.2015թ.-ին ունի ժամկետանց հարկային պարտավորություններ Հայաստանի Հանրապետության պետական բյուջեի նկատմամբ:

6. Խորհրդի հիմնավորումները և եզրահանգումը

Խորհուրդն, ուսումնասիրելով ՍՅ-ԳԲԽ-45/16 բողոքը, գտնում է, որ այն ենթակա է բավարարման՝ հետևյալ հիմնավորմամբ.

Խորհուրդն, ուսումնասիրելով «Գորիսի բժշկական կենտրոն» ՓԲԸ-ի 11.04.2016թ. թիվ 30 գրությունը և կից փաստաթղթերը, «Սամնարպրինտ» ՍՊԸ- 24.05.2016թ., 06.06.2016թ. և 21.06.2016թ. համապատասխանաբար, թիվ 09/5662-16, թիվ 09/5971-16 և թիվ 09/6444-16 գրությունները և կից փաստաթղթերը, հայտնում է հետևյալը.

Օրենքի 5-րդ հոդվածի 1-ին մասի 2-րդ կետը սահմանում է, որ **գնումների գործընթացին մասնակցելու իրավունք չունեն անձինք, որոնք ունեն ժամկետանց պարտքեր Հայաստանի Հանրապետության հարկային և պարտադիր սոցիալական ապահովության վճարների գծով:**

Օրենքի 5-րդ հոդվածի 1-ին մասի 4-րդ կետի «բ» ենթակետի համաձայն՝ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, **եթե հայտը ներկայացնելու պահին նախորդող տարվա ընթացքում գնման գործընթացի շրջանակում ներկայացրել է կեղծ տվյալ:**

Օրենքի 31-րդ հոդվածի 1-ին մասը սահմանում է, որ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

Օրենքի 48-րդ հոդվածի 6-րդ մասի 7-րդ կետի համաձայն՝ ՀՀ գնումների բողոքարկման խորհուրդն իրավունք ունի որոշում կայացնելու մասնակցին գնումների գործընթացին մասնակցության իրավունք չունեցող մասնակիցների ցուցակում ներառելու համար:

Կարգի 47-րդ կետի 1-ին ենթակետի համաձայն՝ հայտերի բացման նիստի ավարտին հաջորդող աշխատանքային օրը հանձնաժողովի քարտուղարն էլեկտրոնային եղանակով Հայաստանի Հանրապետության ֆինանսների նախարարություն հարցում է ներկայացնում առաջին և հաջորդաբար տեղ զբաղեցրած մասնակիցների՝ Հայաստանի Հանրապետության պետական բյուջեի նկատմամբ հայտը ներկայացնելու օրվա դրությամբ ժամկետանց հարկային պարտավորությունների, ինչպես նաև նույն կարգի 67-րդ կետով նախատեսված

որակավորման պահանջի առկայության վերաբերյալ՝ ներկայացնելով հարկ վճարողի հաշվառման համարը:

Կարգի 48-րդ կետի համաձայն՝ Հայաստանի Հանրապետության ֆինանսների նախարարությունը նույն կարգի 47-րդ կետի 1-ին ենթակետով նախատեսված հարցումն ստանալու օրվան հաջորդող երկու աշխատանքային օրվա ընթացքում էլեկտրոնային եղանակով պատվիրատուին տրամադրում է հարցման մասին եզրակացություն: Նույն կետով սահմանված ժամկետում Հայաստանի Հանրապետության ֆինանսների նախարարությունից եզրակացության չստացման դեպքում մասնակցի ներկայացրած հայտարարությունը համարվում է իրականությանը համապատասխանող: Եթե տրամադրված եզրակացության արդյունքում մասնակցի ներկայացրած հայտարարությունները որակվում են իրականությանը չհամապատասխանող, ապա՝

1) հայտերի գնահատման արդյունքների հրապարակման նիստում հանձնաժողովի որոշմամբ տվյալ մասնակցի հայտը մերժվում է, և

2) այդ մասնակցի տվյալները գնման գործընթացին մասնակցելու իրավունք չունեցող մասնակիցների ցուցակում ներառելու գործընթաց նախաձեռնելու նպատակով ի հայտ եկած հանգամանքների մասին տեղեկությունները պատվիրատուի կողմից ուղարկվում են Հայաստանի Հանրապետության ֆինանսների նախարարություն՝ դրանց ի հայտ գալու օրվան հաջորդող երեք աշխատանքային օրվա ընթացքում:

Կարգի 125-րդ կետի 1-ին ենթակետի համաձայն՝ Օրենքի 5-րդ հոդվածի 2-րդ մասով նախատեսված՝ գնումների բողոքարկման խորհրդի ընդունած որոշման հիման վրա մասնակիցը գնումների գործընթացին մասնակցելու իրավունք չունեցող մասնակիցների ցուցակում ընդգրկվում է՝ **6 ամիս ժամկետով**, եթե ավելի քան մեկ անգամ խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, որի հետևանքով տուժանքի, հաշվարկված վնասի, տույժի կամ տուգանքի չափը չի գերազանցում գնումների բազային միավորը և մինչև բողոքարկման խորհրդի կողմից համապատասխան որոշում ընդունվելը՝ պատճառված վնասը, հաշվարկված տույժը կամ տուժանքը վերականգնվել է **կամ, եթե Հայաստանի Հանրապետության պետական բյուջեի նկատմամբ հայտը ներկայացնելու օրվա դրությամբ ունեցել է ժամկետանց հարկային**

պարտավորություններ կամ որակավորման չափանիշների, իսկ ապրանքների գնման դեպքում՝ նաև տեխնիկական բնութագրերի գնահատման արդյունքում այդ որակավորման չափանիշները կամ տեխնիկական բնութագրերը որակվել են որպես մասնակցի կողմից ներկայացված հայտարարություններին չհամապատասխանող:

«Սամնարպրինտ» ՍՊԸ-ն Ընթացակարգին մասնակցելու նպատակով ներկայացրած հայտի N 2 հավելվածով՝ Ընթացակարգին մասնակցելու նպատակով հրավերով սահմանված մասնակցության իրավունքի պահանջներին իր տվյալների համապատասխանության մասին հայտարարությամբ, հայտնել և հավաստել է, որ հայտը ներկայացնելու օրվա դրությամբ չունի ժամկետանց պարտքեր ՀՀ հարկային և պարտադիր սոցիալական ապահովության վճարների գծով:

Պատվիրատուն, ՀՀ ֆինանսների նախարարությանն ուղղված՝ Կարգի 47-րդ կետի 1-ին ենթակետով նախատեսված տվյալների ճշտման մասին կատարված հարցմամբ, խնդրել են տրամադրել տեղեկատվություն «Սամնարպրինտ» ՍՊԸ-ի վերաբերյալ, որին ի պատասխան տրամադրվել է եզրակացություն, համաձայն որի՝ «Սամնարպրինտ» ՍՊԸ-ն՝ հայտը ներկայացնելու օրվա **(08.12.2015թ.)** դրությամբ ունեցել է 231.793 ՀՀ դրամ ժամկետանց հարկային պարտավորություններ:

Վերոհիշյալ փաստը հաստատվել է նաև ՀՀ ԿԱ պետական եկամուտների կոմիտեի 01.08.2016թ. Կենտրոնին ուղղված թիվ 6-1/22950-16 գրությամբ, որի համաձայն 21.07.2016թ. դրությամբ «Սամնարպրինտ» ՍՊԸ-ն 08.12.2015թ. ունի ժամկետանց հարկային պարտավորություններ Հայաստանի Հանրապետության պետական բյուջեի նկատմամբ:

Այսպիսով՝ ՀՀ ֆինանսների նախարարության 02.04.2016թ. տրամադրված եզրակացության համաձայն՝ «Սամնարպրինտ» ՍՊԸ-ի կողմից Ընթացակարգին մասնակցության հայտի N 2 հավելվածով ներկայացված հրավերով սահմանված մասնակցության իրավունքի պահանջներին իր տվյալների համապատասխանության մասին հայտարարությունը չի համապատասխանում իրականությանը և Օրենքի 5-րդ հոդվածի 1-ին մասի 4-րդ կետի «բ» ենթակետի տեսանկյունից հանդիսանում է կեղծ տվյալ:

Օրենքի 5-րդ հոդվածի 1-ին մասի 4-րդ կետի «բ» ենթակետի համաձայն՝ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե **հայտը ներկայացնելու պահին նախորդող տարվա ընթացքում գնման գործընթացի շրջանակում ներկայացրել է կեղծ տվյալ:**

Այսպիսով, Օրենքի 5-րդ հոդվածի 1-ին մասի 4-րդ կետով նախատեսված՝ գնումների գործընթացին մասնակցելու իրավունք չունեցող մասնակիցների ցուցակում մասնակցին ներառելու համար **պարտադիր և միաժամանակյա առկա հիմքերն են՝**

- նույն կետի «բ» ենթակետերով նախատեսված և մասնակցին վերագրվող խախտման առկայությունը,
- խախտումը թույլ տալու պահից մեկ տարվա ընթացքում մասնակցի կողմից գործընթացին մասնակցելու համար հայտ ներկայացրած լինելու հանգամանքը:

Հետևաբար, Օրենքի 5-րդ հոդվածի 1-ին մասի 4-րդ կետով նախատեսված՝ գնումների գործընթացին մասնակցելու իրավունք չունեցող մասնակիցների ցուցակում «Սամնարպրինտ» ՍՊԸ-ին ներառելու համար անհրաժեշտ է, որ նույն կետով սահմանված և **Ընկերությանը վերագրվող խախտում թույլ տալու պահից մեկ տարվա ընթացքում անձը մասնակցած լինի գնման որևէ գործընթացին և ներկայացրած լինի հայտ**, քանի որ օրենքի նշված նորմի համաձայն՝ մասնակիցն ընդգրկվում է նշված ցուցակում, եթե վերագրվող խախտումը կատարվել է հայտը ներկայացնելու պահին նախորդող տարվա ընթացքում:

ՀՀ ֆինանսների նախարարությունը 25.07.2016թ. Կենտրոնին ուղղված թիվ 1/73-3/19014-16 գրությամբ ներկայացրել է «Թիվ 15 պոլիկլինիկա» ՓԲԸ-ի 15.07.2016թ. թիվ 79 գրությունը, որի համաձայն՝ «Թիվ 15 պոլիկլինիկա» ՓԲԸ-ի կարիքների համար կազմակերպված «ԱԲԿ-ՇՀԱՇՁԲ-15/3-16/11» ծածկագրով գնման ընթացակարգին մասնակցելու նպատակով «Սամնարպրինտ» ՍՊԸ-ն 04.06.2016թ. ներկայացրել է հայտ:

Այսպիսով՝ Խորհուրդն արձանագրում է, որ «Սամնարպրինտ» ՍՊԸ-ի վերաբերյալ միաժամանակ առկա են Օրենքի 5-րդ հոդվածի 1-ին մասի 4-րդ կետով նախատեսված՝ Ցուցակում ներառելու երկու հիմքերը, քանի որ Ընկերությունը **08.12.2015թ.** մասնակցելով «ՍՄԳԲԿ-ՇՀԱՇՁԲ-15/38» ծածկագրով շրջանակային համաձայնագրերի միջոցով գնում կատարելու ընթացակարգին, ներկայացրել է կեղծ տվյալ՝ թույլ տալով Օրենքի 5-րդ հոդվածի 1-ին մասի 4-րդ կետի «բ» ենթակետի խախտում և **04.06.2016թ.** կրկին հայտ է ներկայացրել «Թիվ 15 պոլիկլինիկա» ՓԲԸ-ի կողմից կազմակերպված «ԱԲԿ-ՇՀԱՇՁԲ-15/3-16/11» ծածկագրով շրջանակային համաձայնագրերի միջոցով գնում կատարելու ընթացակարգին:

Հիմք ընդունելով վերագրյալը՝ Խորհուրդը գտնում է, որ Ընկերության կողմից խախտվել են Օրենքի 5-րդ հոդվածի 1-ին մասի 4-րդ կետի «բ» ենթակետի պահանջները, այն է՝ **հայտը ներկայացնելու պահին նախորդող տարվա ընթացքում գնման գործընթացի շրջանակում**

Ընկերությունը ներկայացրել է կեղծ տվյալ, որը հիմք է «Սամնարպրինտ» ՍՊԸ-ին գնման գործընթացին մասնակցելու իրավունք չունեցող անձանց ցուցակում ներառելու համար:

Մինչդեռ ժամանակ խորհուրդը արձանագրում է, որ սույն որոշման կայացման օրվա դրությամբ, Ընկերության կողմից չեն վերականգնվել Կենտրոնի և «Սամնարպրինտ» ՍՊԸ-ի միջև 14.04.2015թ. կնքված «ՇՀԱՇՁԲ-15/3-62» ծածկագրով շրջանակային համաձայնագրին համապատասխան հաշվարկված տուժանքի գումարը:

Ելնելով վերոգրյալից և ղեկավարվելով «Գնումների մասին» ՀՀ օրենքի 48-րդ հոդվածի 6-րդ մասի 7-րդ կետով՝ ՀՀ գնումների բողոքարկման խորհուրդը

Ո Ր Ո Շ Ե Ց

ՀՀ ֆինանսների նախարարության 11.04.2016թ. թիվ 1/73-1/11828-16 գրությամբ ներկայացված «Սամնարպրինտ» ՍՊԸ-ին (ՀՎՀՀ՝ 01244541) գնումների գործընթացին մասնակցելու իրավունք չունեցող մասնակիցների ցուցակում ընդգրկելու պաշտոնական ընթացակարգով նախաձեռնած բողոքը բավարարել՝ Ընկերությանը ներառել գնումների գործընթացին մասնակցելու իրավունք չունեցող մասնակիցների ցուցակում՝ ՀՀ գնումների բողոքարկման խորհրդի որոշումը կայացվելու օրվանից հաշված վեց ամիս ժամկետով:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի որոշումը կարող է բողոքարկվել դատական կարգով:

Բողոքը քննող հանձնաժողով՝

Անդամներ՝



Մարդյան Ռոման

Նալբանդյան Մարտիկ